



## 霸凌

前幾日有一條細新聞，在美國有一個十二歲個細人仔，在學校長期分同學嘅佢「大籐」，看起來笨笨，大家人聯合欺負佢，佢佇毋著這個壓力，就吊頸自殺。佢个阿姆盡傷心，就將佢在棺材肚个面容翕相放上網路，希望大家人重視學校霸凌，毋好過有恁仔个事件發生。

在僱等國內，三年前有一個細妹仔明星，也係因為有兜人在網路寫盡多罵佢个話，佢毋知愛仰結煞正好。雖然有朋友支持佢，喚佢莫搭網路該兜壞話，還係無法度擋佢行上自殺个絕路。這明星有一個大佢十二歲个阿哥，痛惜老妹恁後生來結束人生，希望減少這種網路霸凌事件，就經營一個面書，專門搵手分人霸凌个人，行出佢等个痛苦。

霸凌同搞寮有麼个無共樣呢？霸凌个方式係霸道、凌虐个，時間係長期个，對象係固定个，造成對方心理、身體个傷害。在學校、在社會、在職場都有可能發生，特別係過畏相、過無朋友个人，過會分人欺負，係無管道做得講，該壓力會害人發癲正得！

愛仰仔減少霸凌？愛先教細人仔同理心。分人罵會心情壞無？分人打會痛無？大家人毋同你做朋友會孤單無？因為今嘎爺哀降(giung)過少，每一個細人仔都係寶貝，無注意就會養成自我中心。在屋下做王慣地，毋管別人个感受，想愛仰仔就仰仔，在外背也愛大家人順佢。一擺兩擺燴別人成功，佢就暢樂地，越至愛去欺負佢，無去想別人个痛苦。

過來愛教學生仔理性思考。在網路看著个事情，蓋多係單方面个講法，有兜人毋知事情个頭尾，覺著自家蓋有正義感，就跔等大家人亂罵，傷害著當事人。等到發現講差地刪核內容，也可能已經有人看過，又流傳出去，到該時後悔也來毋掣地。故所愛先思考，在網路寫任何个話係愛負責任个，毋係屏在電腦後背就無事情，電信警察共樣查得著位所。

過來就係愛有對抗个勇氣。雖然大人儕教僱等愛好好同人相處，一旦有人挑事尋麻煩，也莫分人騎到頭那頂來。做得報告先生，或者去報案，應該愛還手个時節就愛還手，保護好自家。愛知自家係有麼个爭差，最傷心个人就係爺哀。你敢盼得分最愛你个人恁痛心？

愛減少霸凌事件，每一個人都愛尊重別人，欣賞別人个無共樣，接受世界有多元共存个現象。細人仔、學生仔愛有正當个休閒活動，練習正確个人際互動，培養正向个人生態度，相信未來就係祥和个社會。

作者：吳秀梅

### ☆詞彙學習☆

【笨笨】bun bun：反應不靈敏的樣子。

【仰結煞】ngiong gad` sad`：怎麼辦。

【面書】mien su`：臉書 facebook。

【畏相】vi xiong：害羞內向。

【燴】hib`：把菜悶熟，引申為欺負人。

【越至】iad zii：更加。

【一旦】id` dan`：一旦。

【挑事】tiau` sii：故意。